



5. marts 2014

Inatsisartut Suleriaasianni § 37 naapertorlugu Naalackersuisunut apeqqutit imaattut matumuuna saqqummiuppakka:

Naalackersuisunut apeqqutit kalaallit Washingtonimi aallartitaqarfittaassaas pillugu:

1. Naalackersuisunut nassuiaqquneqarpoq Washingtonimi kalaallit aallartitaqarfittaassaas pillugu Kalaallit Nunaat Danmarkilu sunik isumaqatigiissuteqarsimanersut.

Naalackersuisunut aamma nassuiaqquneqarpoq aallartitaqarfeqarneq qanoq akeqartussatut naatsorsuutigineqarnersoq kiisalu aningaasat sumorpiaq atorpeqassamaarnersut.

2. Naalackersuisut uppernarsarsinnaanerlugu Washingtonimi kalaallit aallartitaqarfiata taamaallaat takutinniaraa Kalaallit Nunaat danskit Washingtonimi ambassadeqarfiani namminerisaminik sulisoqartoq sulisorlu taanna sutigut tamatigut danskit ambassadeqarfiannit oqartussaaffigineqartussaasoq?

3. Suna pissutaava Naalackersuisut isumaqalersitsiniarmata Washingtonimi aallartitaqarfittaassaasq immikkoortuusoq nammineq aalajangiisinnaalluni?

(Inatsisartunut ilaasortaq Andreas Uldum, Demokraatit)

Tunngavilersuut:

Nunanut allanut ministeri Martin Lidegaard, Kalaallit Nunaata Washingtonimi aallartitaqarfittaarnissaa pillugu Folketingimi isumasioqatigiinnissamut aggersarneqarami paatsuugassaangitsumik oqaluppoq.

Ilaatigut erseqqissarpaa Kalaallit Nunaat immikkut ambasaditaalinngitsoq sinniisoqarfittaalinngitsorluunniit nammineq aalajangiisinnaalluni. Demokraatit isaannik isigalugu malunnarpoq Kalaallit Nunaat danskit ambassadeqarfianni sulisortaalersoq, niuernermit aningaasarsiornermullu tunngasunik suliaqartussamik, qularnanngitsumik iluaqutaasussamik.



Paarlattuanilli ilimanangilluinnarpoq oqaatigineqaraluartutut immikkut aallartitaqarfiliortoqalersoq nunanut allanut tunngatillugu nammineq aalajangiisinnaasussamik.

Demokraatini uggoraarput Naalakkersuisut aallaqqaataaniilli, danskit ambassadeqarfianni kalaallip sulilersussap suliassai pillugit ammasumik unneqqarissumillu oqalussimanngimmata. Uangut isumaqaleraluarpugut – aammali qularnangitsumik innuttaasut tallimanngormat isumasioqatigiinnissaq tikillugu isumaqaleraluarput – immikkut aallartitaqarfiliortoqalersoq, paasinarporli taamaanngitsoq. Ilaananngitsoq.

Apeqqutit akeqquneqarput ullut suliffiit naliginnaat qulit iluanni.